

SAN JUDAS KARTA

Dxus pa'yanisawe'sxtxi Judas fxi'jni

¹ Jesukristo's selpisáa Jakobo nyakh Judas naa karta's fxi'jaçthu Dxus pa'yanisawe'sxtxi. I'kwe'sxa' Jesukristo jxpe'jni wala ew ũsi'kwe.

² Txãasa Dxus peeygãani wēt yuuçxáa mfxi'zewe.

Īsxiina fxiy kaapiya'jsa ũsta'

³ Kwe'sxtxi na'wē Dxus nwe'wek txã'sçxáana wejx áate kaapiya'jna fxi'jya'wath yu' i'kwe'sxtxi. Nawa txã'wē yūumée fxiy yu'kxpehwa'kh kaseh txã'sna wejx dud fxi'jaçthu i'kwe'sxtxi neewe'wena, na'wē Jesukristo's ũuste jxpa'gaçxa nwēese'jwa'ja's kaapiya'jni yuuk txã'sa' jxpa'gayã'jçxa', weh yuhwa yu'pthejkahmen.

⁴ Txã'wēme' maa nasaíi yu' ĩsxiina fxiy kaapiya'jsa ũsyã'tha', nawa txã'wē yūusa' Dxus kastigo seena'te khēeya' u'jwa'jsata' jīna txāniitey pta'sxni yā'kh yu' Dxus librute. Txãa nasa' wala kazx ewmeesata', txã'wēçxaíitx kwe'sxtxi taki'sa Dxusnawa weeçxna naa kiwete ewmeesa yuuçxáana kxtey yuuna fxi'ze'. Sa' kwe'sxtxi jxpe'jsa Jesukristonawa txã'wēytxi weeçxi'.

⁵ I'kwe'sxa' jiiyã'jne'kwe nawa ki' kaayaki'jya'wath na'wē yūuni's: Dxusa' Israelwe'sxtxi Egipto kiweju kutxi'jçxawa, maáíi yuutxi's ivxiituk nwēese'pha'gamée.

⁶ Txã'wëy angeleswe'sxwa jxpa'yakxpa'gamée txãawe'sx yujuni's nvxihtxi, açã' Dxusa' txãawe'sxtxi' preesu'jçxa ji'pha' çxhi'dx walate kastigãywa'j en ähtewe'sx.

⁷ Txã'wëy Sodoma Gomoçxa vxite' txãa ja'dasuwe'sx çxhabwa iiméh kazxsateçxáatx fxi'zena ũsu' peekx kakwe's suwsaçxáana nwëese'jna. Txã'wë kazx yũupa'ga bagaçxte yuhwa pçuwa'jmée ipx wala seena'te kastigãynitx yuu txãa angeleswe'sx na'wëy. Txã'wë kastigãynisa' kaajiyu'jsata' maawa txã'wëy yũukahmen.

⁸ Txã'wëtewa txãa nasa ĩsxiisawe'sxa' ewmée yajxna txãawe'sx kakwe's pkaltetx kaafx'i'ze'je', sa' jxkaahsawe'sxtxiwa weeçxna wëesxuna Dxusnawa weeçxi'tx.

⁹ Angel npiiçthë'j Migwel yuhwa txã'wë yu' wëesxumeea' Moises kakwe's eçxthë'j jxũna u'j wëjeçte, txãa yakh puutx we'wena ũsçxawa. Naasáa idxa's Dxus jiina jĩnaçxáak we'we.

¹⁰ Nawa txãa piçthë'j ĩsxiisawe'sxa' jiimeeweete ewmeetx açewe'we'. Txãawe'sxa' tajkx na'wëçxáawa yajkxya' ãjani yu'sa' txãawe'sx ivxiituwa'the íiçxáatx kaaselpi'ji'.

¹¹ Kainwa ma'wëga yuu txã'wëyçxáa yũusaata' naa pa'ga txãawe'sxa' wala yuh nxuste pa'jwa'jsata'. Vxyu wala ji'phu wëeçxa Balaan na'wëytxi jxpuba. Sa' Koréwa ma'wëga ewmée açewe'wepa'ga uu txã'wëy vxitutxna.

¹² I'kwe'sx weçxana pkhaakhenisu kaythame'jya' pa'jsaçxáata'. Txãawe'sxa' kxsũ pa'jçxa thaamewa'ja's ji'phmeetx ũ'na tudxna fxi'ze', i'kwe'sx ksxavxyte thaamewa'jmée.

Txãawe'sx ew fxi'zewa'jçxá'stxi yaaki' vxite yuutxi's peeygãhmée. Tãapha's wejxa mteewa jxūna u'jnisa na'wěsaçxáata' seelpimeesa. Fxtūu tasx yūnsamée na'wēsata'. Txãa fxtūu tasxa'swa ma'wē peena yu' ye'çxkahnén petx weçe jxuka khubeni yuukx txã'wěsaçxáata'.

¹³ Mar weeswée seena' bu'çxisa na'wētx yu' txãawe'sx ewmée thaampa' yūuni yakh. Estrelxa txajx u'jwa'j dxi'ja's jxpubasáa na'wēsata'. Bagaçxteçxáa yuhwa kasehwa'jmée ewmée seena' nxusnxus çxhi'dxte nvxiitni yuuwa'jsata'.

¹⁴⁻¹⁵ Adan nçun sietetewe'sx Enokha' na'jik Dxus kaaūusuthe'jni's: Txã'wē ewmée yūuni's jxukaysatx paapējçxça nasa seena' ewmeesatxi's jxukaysatx kastigãyya' Dxusa' txajx nasa iiméh wala kuhsa yakh yuhte uythu, txãawe'sx makwethē'jne'ta ewmée yūuna fxi'zeçxa txã'wēy Dxusnawa açewe'we txãa pa'ga kastigãyya' jī'k Enokha'.

¹⁶ Nasa txã'wěsa' e'sga nuywe'wena fxi'zesaçxáata', sa' peekx kakwete wēt fxi'zewa'ja'sçxáatx pakwe', txã'wē e'sga yu' açewe'weççxawa āate yu' ewçxáatx we'we', txãawe'sxtxi wa'lmée pu'çxkahn.

*Dxus yakh fxi'zesatx neewe'weni
jxpa'yakxkahn*

¹⁷ Nawa yakthē'jwe'sx miiyajkwewe: Jesukristo jxkaahnisawe'sxa' nyafxíi pta'sxtxi na'jīna:

18 Nmeh en yuuchte' nasa' pa'jatxna Dxus jxkaahni yu'sa' weeçxna txãawe'sx ũus yaakxni ewmeesaçxá's nwēese'jsawe'sx jīnatx we'we.

19 Txãawe'sx txã'wē nasatx kaapui'jsa yuutxna, txãawe'sx ũus yaakxni ewmeesa's nwēese'jsa, Dxus Espiritu yu's ũuste ji'phmeesa.

20 Nawa yakhthē'jwe'sx, i'kwe'sxa' Jesukristo's ũuste jxpa'gaçxa nwēese'jwa'ja's kaapiya'jni yuuk txã'sa' jii yā'jçxa', txãajū yu' peena kasehnuwe. Dxus Espiritu's jxpi'kxçxa, Dxus yakh mpuutxwe'wewe.

21 Dxus peeygāanijū txutemée ũythasna meswe, kwe'sx āhmeekwetewa Jesukristo peeygāhçxa багаçxte yuhwa pçumée ĩtxi fxi'zewa'ja's ũswa'j en āhpkaçx.

22 Vxitewa jxpubawe'sxte ew mkaajiyu'jwe.

23 Vxitetx peeygāhçxa menwe'wewe ipx walate khēeya' yā'j ũssatx. Nawa ewmeesa's jxpa'yakx. Txã'wēme' ropa yuhwa jxuka ewmeesaçxáa pēethenita'.

Dxusa's weçxana fxi'jni

24-25 Dxus kwe'sxtxi nwe'wesa txãa yuuçxáa kīhte yuhwa sxiigmée jxpe'jsa i'kwe'sx ewmeete wetekahmen ewte jxpe'jya' ājawa'jsa'. Txã'wē yūuçxa i'kwe'sxtxi kīh pkal yuhwa ji'phmée txajx weçxana ũsnite nuypa'jana. Txãa yuuçxáa jx-tuhthesa', maatewa jxthaakwe walasa, kīhtewa jxuka ājasa'. Txãa yuuçxáa jxkaahsa'. Sa' Dxus ũsnite i'kwe'sx pa'jya' ājakahn kwe'sxtxi jxpe'jsa Jesukristo' pu'çxhina. Nyafxiiteywa txã'wēk pu'çx na' āçxwa txã'wēy íiçxáa pu'çxhina, sa' багаçxtewa pu'çxna nes yuuna.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd